

Dithero tsa Tirelano mo Kutlwanong

14/2015 Thero ka Sontaga e e bidiwang Estomihi, e le ka 22. 02. 2015

Mo leineng la Modimo o e leng Rara le Morwa le Mowa o o Boitshepo!

Lefoko le le okamelang beke eno, letsatsi le, le kwadilwe mo go Luka 18:31, le re: **"Jaanong a itseela ba ba 12, a ba raya a re: "Bonang, re itlhatlogela kwa Jerusalema, mme tsotlhe tse di kwadilweng ka ga Morwa-Motho ke baporofeti di tla dirafala."**

1. Sefela sa 283 - 265/271

2. Thapelo: Modimo o o kutlwelobotlhoko, Rara yo o rategang, re lebogela phattha ya gore re kopane fano go go tumisa, Morena. Re a kopa gore o re fe tumelo, o re bolokele mo tumelong e e go ikanyang, e e sa feleng, le fa re le mo boitumelong, le fa re le mo bothateng, mme re nne re itse gore wena o teng, o nna le rona ka metlha. Bua, Morena, gonne batlhanka ba gago ba a go reetsa. Bua le nna, Morena, gore ke bue le bana ba gago, o ba abele, Rara, thata ya go tlhaloganya gore ga se nna yo ke buang, mme ke wena ka wesi yo o buang. O re abele lorato, le thata gore re ikokobeletse Lefoko la gago ka ene Jesu Keresete, Morena, Mopholosi wa rona. Amen.

3. Lefoko la Testamente e kgologolo le kwadilwe mo go Amos 5:21-24;

Epistolo ka fa thulaganyong ya 2 e kwadilwe mo go 1 Bakorinthe 13:1-13;

Efangele ka fa thulaganyong ya 3 e kwadilwe mo go Luka 10:38-42.

4. A go ipolelwe tumelo ya bokeresete!

5. Sefela sa - 267/273

6. Thapelo ya mmadi wa thero.

7. Efangele ka fa thulaganyong ya 1 e kwadilwe mo go Mareko 8:31-38, e re: "Jaanong (Jesu) a simolola go ba ruta gore Morwa-Motho o tshwanetse go boga dilo tse dintsi, le go latlwa ke bagolo ba morafe le baperesiti ba bagolo le baitse-dikwalo, le go bolawa, le go tsoga morago ga malatsi a mararo. Lefoko le a le bua ka phuthologo. Ke fa Petoro a mo tseela kwa thoko, a simolola go mo kgalemela. Mme Jesu a retologa, a leba barutwa ba gagwe, a kgalemela Petoro a re: 'Mpota morago, Satane! Gonne ga o batle tsa Modimo, o batla tsa batho.' Jaanong a ipiletsa batho ba ba leng teng mmogo le barutwa ba gagwe, a ba raya a re: 'Fa mongwe a rata go ntshala

morago, a a itlogele, a sikare sefapaano sa gagwe, a ntshale morago! Gonne yo o ratang go boloka botshelo jwa gagwe o tla latlhegelwa ke jona; mme yo o latlhegelwang ke botshelo jwa gagwe ka ntlha ya me le ka ntlha ya Efangele o tla bo boloka. Gonne go ka thusa motho eng, fa a ka bapala lefatshe lotlhe, mme a senyegelwa ke botshelo jwa gagwe jwa nnete? Kampo motho o ka ntsha eng go nna segololo sa botshelo jwa gagwe? Gonne mongwe le mongwe yo o tlhajwang ke ditlhong ka ntlha ya me le ka ntlha ya mafoko a me mo losikeng loo lwa boikepo le boleo, Morwa-Motho le ene o tla tlhajwa ke ditlhong ka ntlha ya gagwe, mogang a tlang ka kgalalelo ya ga Rraagwe, a na le baengele ba ba boitshepo." Amen.

8. Thero: Barategi mo Moreneng, re utlwile ka sefela se re tswang go se opela gore se bua ka ga yo o mo sefapaanong. Ditemana tsa ntlha tsa Efangele ya kajeno di supa ka ponatshego gore Jesu o ruta ka ga dipogo tsa gagwe, le ka ga tsheko e ba le bantsi ba mo latlhileng mo go yona. Ke rata go bua gore thuto e kgolo ya thero eno e re: Morena, wena wa boga ka ntlha ya maleo a me, o nkabele thata gore ke se nne le ditlhong ka ntlha ya gago. Morena Jesu a baya ka ponatshego gore di dintsi tse a tshwanetseng go di boga, e bile a supa gore ke bomang ba ba mo latlhang. Teng fano re bona kgakgamatso ya gore batho ba ba rutang dikgang tsa Modimo, le bone ba ba reng ba itse sentle Dikwalo, ke bone ba ba ganetsang Morena wa barena. Ke bona ba ba mmogo le batho ba ba reng: Jesu o ruta tse di fapaanyeng le Dikwalo. Ke bona ba ba mmogo le ba ba tsenyang mowa mo bathong gore Jesu a bapolelwe mo sefapaanong. Morena o bua ka ga tse di tlogileng tsa mo diragalela.

Re tshwanetse go tlhokomela batho ba ba reng ba bua ka ga Lefoko la Modimo, mme ba rera, ba ruta se se fapaanyeng le lona. Jesu ga a khutle fela ka go ruta ka ga kang ya dipogo tsa gagwe, mme e bile o bua ka ga tsogo ya gagwe morago ga malatsi a le mararo. Tsogo ya gagwe e raya gore mmaba yo mogolo wa gagwe, e bong Satane o fentswe. Ka moo rona batho ba gagwe ga re direle moswi, mme re direla Morena yo o kileng a swela mo sefapaanong, a ba a tsoga, a fenyja loso. Petoro fa a ne a utlwa polelelo pele ya dipogo tsa Morena, a simolola go kgalemela Jesu. Seo se tshwana le gore motho o bua a re: O se ka wa bua jalo, gonne se o se buang ga se a tshwanela go go diragalela. Morutwa yoo wa ga Jesu o bua tsa motho, gonne o ne a sa tlhaloganye se se tshwanetseng go diragala, gape o ne a sa rate go kgaogana le Morena wa gagwe. Re tla gopola, phuthago, gore ke ene morutwa wa ga Jesu yo o kileng a itatola Jesu, fa tseo tse di builweng ke Jesu di diragetse. Ke ene gape morutwa yo Jesu a mmoleletseng a re: "Simona, Simona, bona, Satane o lo ipatletse gore a lo olose jaaka mabele; mme nna ke go rapeletse gore tumelo ya gago e se khutle. Mme wena e re o sena go sokologa, o tiise bakaulengwe ba gago," Luka 22:31-32.

Ya re Jesu a utlwa se se builweng ke Petoro, a mmolelela a re: "Mpota morago, Satane! Gonne ga o batle tsa Modimo, o batla tsa batho." Go a makatsa, fa Jesu a sa bue gore mpota morago, Petoro, mme a re: "Mpota morago, Satane!" Re tshwanetse go ithuta fano gore Satane o kgona go re dirisa gore re ganele le dithulaganyo tsa Modimo. Morena o itse sentle gore ke Satane yo o buileng ka morutwa yoo, mme o supa ka thanolo gore morutwa yoo o ne a sa tlhaloganye tsa Modimo, o ne a bua, a batla tsa batho. Tiro ya Modimo ga se e e botlhofo. Rona batho ga re kgone go e tlhaloganya kwa ntle ga go senolelwa ke Modimo, kwa ntle ga go bolelelwa ke Modimo tse di tshwanetseng go diragala. Rona re itse ditsela tsa batho, mme tsa Modimo re ganela le tsona. Satane o ne a tsena mo go Atame le Efa, ba dira tse di fapaanyeng le taolo ya Modimo. Le rona Satane o re dirisa ka tse di gogelang motho mo tatlhegong.

Barategi, Morena o bua mo bontsing, le mo barutweng ba gagwe ka ga go itlogela, le go sikara sefapaano, le ka ga go mo sala morago. O baya mo ponatshegong gore motho o tshwanetse go dira tseo, ke raya mongwe le mongwe yo o ratang go mo sala morago o tshwanetse go tsamaya mo motlhaleng wa gagwe. Mafoko ao a supa ka thanolo gore motho ga a patelediwe gore a dire tse tsotlhe tseo, mme ke tshwanelo gore di diragale ka lorato.

Lefoko le baya mo ponatshegong gore go na le batho ba ba ratang go ipolokela botshelo, mme ba tla latlhegelwa ke jona. Go na le ba ba latlhegelwang ke botshelo ka ntlha ya Morena Jesu, le ka ntlha ya Efangele ya gagwe. Bone ba tla bolokelwa botshelo jwa bona. Tsotlhe tseo di bewa fa pele ga rona gore re itlhaolele gore re batlang. Di dintsi tse di leng teng mo lefatsheng tse re ka reng ka ga tsona re a di itlhaolela. Ba bantsi batho ba ba tlotlegileng, ba ba itsiweng, ba itsiwe ka gore ba dirisa tsa lefifi. Le fa go ntse jalo, o ka re: go na le ba le bantsi ba ba itlhaolelang gore ba thusiwe ke bone. Go a dirwa ke batho, ba re: Ba ipolokela botshelo jwa bone. Mme ga ba lemoge gore tota-tota ba latlhegelwa ke jona.

Re tshwanetse go ipotsisa gore a tota re na le thata go ipolokela botshelo jwa rona, gongwe nyaya? Go na dingaka tsa ditshipi, go na le dingaka tsa mereo, go na le balaodi ba ditaola, go na le barapeledi ba bagolo, le ba bangwe ba le bantsi ba ba itsiweng ke batho gore ba ipitsa bapholosi, bafodisi, babolokedi ba botshelo, mme potso e re: A ke phodiso, gongwe phologo e e sa khutleng, gongwe ke ya sebakanyana fela?

Gantsi re tlogela go supa Efangele, re boifa go bua boammaaruri, gonne re re batho ga ba rate go utlwa ka ga dikgang tseo, ba re: Ba tla re bolaya, ba re watlhave, ba re tlhowe, gongwe ba re direle, le fa e le bosula jo bo ntseng jang. Ka moo gore re ipolokele botshelo jwa rona, bogolo re didimale, re se bue sepe, bogolo re bue maaka a a ratiwang ke lefatshe.

Mme dipotso tsa Morena ke tse dikgolo tota, tsona tse di reng: "Gonne go ka thusa motho eng, fa a ka bapala lefatshe lotlhe, mme a senyegelwa ke botshelo jwa gagwe jwa nnete? Kampo motho o ka ntsha eng go nna segololo sa botshelo jwa gagwe?" Fa Morena a re botsa jalo, re ka buang gore re ka tshabela kae, re ka bona kae botshelo kwa ntle ga gagwe? Ke bolwetse jo bo maswe, ke tshotlo e re nang le yona, rona batho. Re rata go tumiswa, le go bonwa ke batho, go tlotliwa, re rata go na le ba ba re salang morago, le tse dingwe. Tseo ke re: re a di dira, ke re: le baruti, bareri, ba phuthego, bathusi, borramatlotlo, le ba maemo a mangwe. Ke bolwetse jo bo leng teng mo gare ga batho, le fa e le ba morafe ofe. Kotsi e kgolo mo go tseo ke go latlhegelwa ke botshelo jo bo sa khutleng. Ka nako e nngwe re ikaya modimo wa lefatshe ka ntlha ya go tlotliwa, ka go dira ditiro tsa lefifi, ka go ratwa ke batho ba le bantsi, re lebala gore Modimo wa boammaaruri o teng, ke ona o o tshwanetseng go tumiswa, le go tlotliwa ke batho botlhe. Re itseeleng tlotlo ya Modimo, re e dire gore e nne ya rona? Re ratelang mo go kalo gore batho ba re tumise rona ba re leng dibopiwa tsa Modimo wa boammaaruri, re dire tseo mo boemong jwa go o tlotla bogolo go dilo tsotlhe?

Ga re na se re ka se ntshang go nna segololo sa botshelo jwa rona, fa e se go dumela mo go Morwa Modimo yo o tsetsweng a le esi. Ke ene fela kgololo ya rona, le botshabelo jwa rona. Kgang eo ga e tshwane le tsa lefatshe kwa batho ba ntshang madi gongwe se sengwe go itetlanya, le go ithuanyana ka go leka go ikgolola mo petsong e e tshwanetseng ditiro tse di bosula tsa bone. Tseo di a diragala, fa motho a lemoga gore o setse a tshwerwe mo ditirong tse di bosula, ke fa a leka go ntsha sengwe go nna segololo sa gagwe se se tla mo femelang mo petsong. Rona batho ga re ka ke ra dira se se ntseng jalo fa pele ga Modimo, gonne ke ona o o re neileng kgololo e e leng Keresete, ga go na e nngwe e e itumedisang Modimo. Ke tshwanelo gore re se nne le ditlhong ka ntlha ya Morena wa rona, le e seng ka ntlha ya tumelo e e ikanyang pholoso e e mo go Keresete, mme re ipolele, re supe ka ga Morena, le fa e le ka nako, le fa e se ka nako, le fa re ka kopana le loso tota, fa re mo ipolela. Gonne le ene ga a nke a re itatola fa pele ga Rraagwe.

Le fa re itse gore re ba morafe wa kgokafalo, re tlola taolo ya ntlha le ya borataro, re akafala ka go direla medimako, re kopana mo diphateng ka go sa tshwanela, re tlhabela medimo e mengwe, re e direle, re e itirele mo boemong jwa go direla ona o o godimo ga tsotlhe, o o godimo ga botlhe. Ke ona o o re bitsang kajeno gore re boele mo go ona, re amogele taletso ya ona gore re dumele gore Jesu Keresete, Morwa Modimo, o re baakanyeditse kgololo e e nonofileng go golola motho mongwe le mongwe, le fa e le wa morafe ofe, gore a gololwe mo boleong jwa kgokafalo, jwa go tlola taolo ya ntlha le ya borataro, le jwa go tlola taolo nngwe le nngwe e sele.

Ke sona se Morena Jesu a se re diretseng ka go ineela mo dipogong le mo losong. O batla gore botlhe ba pholosiwe ka go dumela mo go ene. Amen.

9. Thapelo: Modimo, Rara wa legodimo, re lebogela lorato lwa gago, re a lo galaletsa. O re neeletse Morwao gore a re duelele melato ya rona ka madi a gagwe. O re abele go amogela maungo a dipogo le loso lwa ga Jesu, re pholosiwe ka go dumela, le ka go amogelwa mo Mopholosing wa rona ka go kolobediwa mo leineng la Modimo o e leng Rara, le Morwa, le Mowa o o Boitshepo, le ka go amogela mmele wa Keresete le madi a gagwe a re a tshologeletsweng go itshwarelwa dibe. Re kopa jalo ka Jesu Kereste, yo o leng teng ka metlha, a busa le wena le Mowa o o Boitshepo, Modimo o le mongwe fela wa boammaaruri, o o se nang tshimologo, le e seng bokhutlo. Amen. Thapelo ya Morena: Rara wa rona yo o mo legodimong ...

10. Sefela sa 113 - 106/102

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke S. E. Sithole, ka ngwaga wa 2003/ya rongwa le ka 2009.

Gates le go rongwa ga dithero tseo go tshegediwa ke kopano e e bidiwang The Lutheran Heritage Foundation.

